

2 Korid

Pol mij kisen ak Korid bin bi kirop ñu kil tikak

1 ¹Yad Pol. God yip ag lek, Krajs Jisas minim dad ameb bi alap midil, mam cin Timoti eip siñaul midil, nibep God bin bi ne taun kib Korid midebim okok abe, Akaia Propins nab nab tigoñ tigoñ magilsek midebim okok abe, mij nibaul ñu kil tikebin. ²Nibep agebin, yip tep gip ak, Bapi God abe Bi Kib Jisas Krajs abe nibep yimig niñil di tep girek, kapkap mid tep ginimib.

Pol God nop tep agak

³Bi Kib cin Jisas Krajs Nap ne God nop tep agin. Bapi God ñi pai ne yimig yib niñil, di tep gil, per per kod mid tep yib gip. ⁴Miker ognap cinop apek, ne cinop kod mid tep gip ak me, cin pen adik gil, bin bi ognap miker apek, kirop ak rek nep di tep gil kod mid tep ginigabin. ⁵Krajs eip midobin ak me, ne yur dak rek cin ak rek nep yur ognap dipin. Pen Krajs eip midobin ak me, ne cinop per per kod mid tep gip niñil cin gos sek midobin. ⁶Nibi mid tep gil gos sek midil, am ne eip per per midenigabim, agil, Krajs Jisas ne miker ognap cinop ñib. Pen Krajs ne cinop kod mid tep gip rek, cin gos sek midobin ak niñigabim ak me, miker ognap nibep apenigab ak, Krajs cinop ak rek nep kod mid tep ginigab niñil mid tep gin, agil, gos sek midenigabim. ⁷Gos cin nipin ak, nibi Krajs nop ma kirig ginigabim. Cir bi omal yur dipir rek, nibi ak rek nep yur dinigabim; pen God cirop mal di tep gip rek, nibep ak rek nep di tep gil kod mid tep gek, gos sek midenigabim.

⁸Pen ai mam sikop niñim. Cir bi omal Esia Propins midil, miker kib dil koslam yib midorok. Komij midojir rek ma lip, bir kimnigabir, agrok. ⁹Bir kimnigabir, agrok. Pen gak ar nibak, cir gos par yib niñ midorok ak me, cir ke kilis midobir, agil, ma apir; God bin bi kimbak okok gek warikpal ak nep cirop kod midek niñlig gi midobir, apir. ¹⁰⁻¹¹Cirop pis

nep ñag pak linimel rek lak ak pen God ne cirop di komiņ yokak ak me, miņi ne cirop kauyaņ di komiņ yokniņ geb. Nibi God nop sobok gilig gi midem, kisen okok abe ne ak rek nep cirop di komiņ yokniņgab, agil, gos sek midobir. Nib ak, bin bi koņai nep God nop sobok gilig gi midel, God ne niņil cirop mal di komiņ yokek me, bin bi koņai nep, ne cirop ginigab ak niņil yib ne agel ar amniņgab.

Pol kirop am ma niņak, minim ak agak

¹²Midmagil cir nab adaņ niņir, bin bi okok eip midil tap tari tari gipir okok, God cirop eip midek niņlig gi, nop gos niņlig gi gipir. Cir minim niņid nep agil gi tep nep gipir. Yad misen agebin, nibep per per nib akniņ rek nep gipir. Pen bin bi okok gos nival rek gos niņil niņ ma gipir. God cirop yimig niņil di tep gil gos ñek niņ gipir. ¹³⁻¹⁴Mij nibep ñu kil tikpin okok, minim bak okok rek agil ma tikpin; nibi uđin li niņil, wagiņ ak kasek niņnimib, agil, misen nep tikpin. Miņi ke ke rek midobin ak me, nibi yip niņim pen yip niņ rep ma gipim; pen yip tep gip ak, yip niņ tep gem me, kisen Bi Kib cin Jisas adik gi oniņgab ñin ak, ap mogim gil, yad nibep niņil miņ miņ ginigain; nibi pen ak rek nep yip niņil miņ miņ ginigabim. ¹⁵⁻¹⁶Ar nibak nep me, ned Masedonia Propins ma amninek ñin ak, yad gos alap niņil nibep am niņniņ niņigain, agnek. Yad Masedonia bin bi kirop niņniņ amniņgain, pen ned am nibep niņil kisen amnin, agnek. Pen adik gi apil, Judia amniņ, kaniņ par nokim nibak nep apil, nibep kauyaņ niņlig gi ap padiknim, agnek. Niņ gen me, nibi miņ miņ gil yip pen gi ñil tap magil ognap ñem ñiblig gi Judia amnin, agnek. ¹⁷Gos nibak rek niņil me, nibep ned minim piņil yoknek ak pen kisen ma ninek. Niņ ginek ak, yip pen agniņgabim, “Bi par ak nop ke tep gip ar ak kisen gil, ‘Giniņgain giniņgain,’ agil, minim nep agil, kisen ma gip. Ne yokop bi minim ñiņ pak ajeņ par ak,” agniņgabim rek lip ak pen, ¹⁸God bi niņid yib nep ageb ak eip midebin rek ak, yad gos omal niņil nibep ma agebin. ¹⁹Yad, Sailas, Timoti, cin nibep God Ñi ne Jisas Kraiņ minim ag ñinok. Jisas Kraiņ gos omal ma mideb. Ne yau, agil, kisen mer ma agniņgab. Minim tari tari ageb ak, ageb rek nep ginigab. ²⁰God minim ar tari tari agak ak, Jisas Kraiņ apil, nib akniņ rek nep magilsek gip. Cin ne niņ gip nibak niņin ak me, God nop sobok gilig gi, Jisas Kraiņ yib ne agil, “Niņid” apin. Niņ gipin ak, God yib ne ak ar alaņ amnaņ, agil, niņ gipin. ²¹God ne nep gek me, cin abe, nibi abe, Kraiņ nop ciņ tep gil midobin. Ne nep me cinop “Bin bi yad ke,” agil, ag lil, ²²Kaun ne ak cinop ñek, apil midmagil nab cin adaņ goņ li mideb. Nib ak cin niņin, cin God bin bi ne ke midobin niņil ne agip agip rek nep magilsek cinop ñiniņgab.

²³Pen yad nibi Korid kai midebim okok niņniņ ginek ak pen amil minim kib agen, nibi yur diņimib rek lip niņil me, nibep yimig niņil me ma niņin. God ne midmagil yad nab adaņ niņip yad esek ma agebin.

²⁴Pen minim yad ak nep kisen gim, agil, gos ar ak ma nipin. Nibi ke Kraiss nop gos nipim ak me, yad am nibep ag ñen, nibi kilis gil Kraiss nop niñ tep gil, cig kilis gil, miñ miñ gilig gi midenimib, agil agebin.

2 ¹Pen yad gos alap niñil agnek, “Kirop kauyañ am niñil minim kilis agen, kirop kauyañ yur dinimel rek lip ak, ma am niñnim,” agnek.

²Pen yad gen nibi yur denigabim ak, an pen midil yip genigab miñ miñ ginigain? Bin bi nibak rek ognap ma midebal. ³Nibak niñil me, nibep mij ñu kil tiknek. Yad gos niñnek, “Amjakil bin bi okok niñil miñ miñ yib gipnep pen mer, amjakil kirop niñen, yip miker yib ginimiñ rek lip ak me, yad ma amnigain,” agnek. Yad gos niñnek, “Yad ke miñ miñ ginigain ak, kiri abe miñ miñ ginigal,” agnek. ⁴Mij ned ñu kil tiknek nibak, midmagil yad ak yur gek, gos par lilig gi, udin ñig tig gi rik yoklig gi ñu kil tiknek. Nibep miker kib ginimiñ, agil, ma tiknek; nibep midmagil yib lipin rek niñnimib, agil, tiknek.

**Bi tap timel gak ak, miñi tap timel gak nibak
kirig gil nop midmagil lil dinimib**

⁵Pen yad gos nipin bi alap gek miker gak ak, yip ma gak, nibep bin bi siñak midebim nibep magilsek gak. ⁶Pen nibi magilsek rek nop kirig gipek ak, ne yur dil, gi timel gak ak bir niñip. Nib ak, miñi nig ma ginimib; kirig ginimib. ⁷Miñi gi timel gak nibak kirig gil, nop minim sain sain agnimib. Tari ginig: nop nig ma gem, yimig kib yib gek, pis nep ap yap paknimiñ rek lip. ⁸Nib ak, yad nibep agebin, nop mam cin agil midmagil lipim ak, nop agem niñ tep ginimiñ. ⁹Yad nibep mij ñu kil tiknek ak, minim yad ak dil, minim tari tari agnigain magilsek kisen gil ginigabim aka, agil, mij ñu kil tiknek. ¹⁰Bin bi nibi okok ognap gi timel genimel pen nibi niñil kirig genigabim ak, yad ak rek nep gi timel genimel nibak niñil kirig ginigain. Pen yad gi timel genimel nibak niñil kirig ginigain ak, Kraiss yip niñ mideb, agil, nibep nen agil kirig ginigain. ¹¹Pen mer ak, Seten cinop Kraiss bin bi ne ognap gek, ap yap pakjin rek lip. Seten per nep, gen ap yap paknimel, agil niñip ak, bir nipin.

¹²Pen Kraiss minim tep ak Troas bin bi kirop ag ñinim, agil, Troas amenek, Bi Kib yip kanib yikek, wög ne ak kariñ lim nibak ginim rek lak ak pen, ¹³mam yad Taitas Troas siñak ma piyo niñnek ak me, yad gos par niñil, Troas bin bi kirop, “Siñaul midem” ag lil, Taitas nop niñniñ Masedonia Propins siñaul onek.

¹⁴Nib ak, God gip rek niñil, nop tep yib agebin. Ñi ne Kraiss nop ag yokek, apil Seten nop di talak migan ne okok lil, cinop dak. Ne cinop dil, ami bi kib rek cinop poñ dil ned ameb niñlig gi, bin bi ke ke okok cinop niñil Kraiss minim tep ne ki tep yib rek nipal. ¹⁵⁻¹⁶Kraiss mab ki tep owep di God nop dagil sobok gi ñib ak rek, cin midobin. Bin bi Kraiss kirop di komiñ yokeb okok ki nibak niñil ki tep akniñ ke niñel, kirop komiñ

midep magil ak ñeb. Pen bin bi Kraiss nop kirig gipal okok, ki nokim nibak nep niñil cip ki timel ak, agel, kirop kimeb magil ak ñeb. Pen bin bi an wög nibak ginimiñ rek lip? ¹⁷Bin bi koñai nep mani tap okok koñai nep din, agil, God Minim tep ne ak ag ajpal. Pen cin akniñ rek ma gipin. God ne cinop ag lil wög ne ginig ag yokil niñ mideb niñlig gi, cin Kraiss bin bi ne midil minim niñid yib nep agin, agil, God Minim tep ne ak yipid gil nep ag ñibin.

3 ¹Pen minim ñu kil tikebin nibaul, “Yad mij ñu kil tiken, cinop di tep ginimel,” agil, ma tikebin. Cin bin bi yokop rek midon, cinop dinimib, agil, bin bi nibi nipim ognap kirop agon, mij ognap ñu kil tik ñel, cin dap nibep ñon niñil, cinop ma dinigabim. Pen nibi, “Bi ognil kirop dinimib,” agil, mij ognap ñu kil tik ñem, cin dam bin bi ognap kirop ma ñinigabin. ²Pen mij midmagil nab cin adaj ñu kil tik mideb rek me, nibi bin bi midebim. Gos cin nipin ak, nibep minim ag ñon niñil dipim ak me, bin bi okok nibep niñil, cin bi tigeñ bi rek midobin ak niñnigal. ³Pen cin Kraiss nop wög gon, Kraiss ne ke mij nibaul ñu kil tikil cinop ñak. Yig tap ñu kil tikep dil tikpal rek mer; kab ar ak ñu kil tikpal rek mer. God per komiñ mideb Kaun ne ak Kraiss minim tep ne ak bin bi midmagil nab kiri adaj tikip.

⁴Yad minim agebin nibaul, God tari tari ageb ak Kraiss magilsek niñ akniñ rek nep ginigab, agil agebin. ⁵Cin nipin, cin kilis cin ke gon wög tep amniñ rek ma lip; God nep me cinop gi ñek niñlig gi, gon wög tep amniñab. ⁶God ne nep gek, cin wög gi ñeb bi ne midil, God Minim kisen nib ag lip ak, damil bin bi okok kirop ag ñibin. God Minim kisen nib ag lip nibak, lo minim ak rek mer; minim kisen nib ag lip ak God Kaun ñib. Lo minim gek, bin bi kimnigal; pen God Kaun gek, bin bi komiñ midenigal.

⁷Lo minim nibak, God kab salai bad ar ak ñu kil tikek, Mosis dapek niñlig gi, melik kib yib gak. Melik kib nibak Mosis milik jo milik ne melik gologip. Midarik midarik melik kib nibak bir kir gek pen Isrel bin bi Mosis milik jo milik ne niñnimel rek ma lak. Lo minim kimeb magil dowak ak pen melik kib yib sek owak. ⁸Pen God Kaun wög ne gip ak melik tep akniñ ke sek mideb. ⁹Minim kib agep lo minim ak melik sek owak rek, cin God uñin yirik ar ne ak bin bi komiñ tep rek lep minim tep nibak melik tep akniñ ke sek owak. ¹⁰Melik tep akniñ ke miñi bir owip ak me, lo minim ned melik sek owak ak miñi melik ma gip. ¹¹Lo minim ak per ma midil kir ginig gek ak pen lo minim ak melik sek owak; nib ak me, minim tep ak per per midil ma kir ginigab minim tep ak melik tep akniñ ke sek mideb.

¹²Nib ak, cin gos sek midil, nabiñ ma dil, kilis gil Kraiss minim tep ak miñeñ ag ñibin. ¹³Mosis gak rek ma gipin. Ne lo minim ak damil, milik jo milik ne ak melik kib yib gak, pen midarik midarik melik kib gak nibak

sikol gek apek niŋlig gi, Mosis ne bin bi okok melik sikol gak nibak ma niŋnimel, agil, usajil bad alap dil, milik jo milik ne ak pak karik ñak. 14-15 Pen gos kiri niŋ tep ma gilak. Tari ginig: usajil bad rek gos kiri kom kam gil midek ak me, God ned birarik nep minim niŋid ag lep agak minim ak udin li niŋlak ak pen minim wagin ak ma niŋlak. Miñi ak rek nep kiri lo minim nibak udin li nipal pen tap usajil bad rek gos kiri kom kam gek, minim wagin ma nipal. Tap usajil bad rek gos kiri kom kam gip ak, Kraiss ne nep di ke okok yokniŋ rek lip. 16 Pen bin bi Bi Kib ak nop onigal ak, ne usajil bad gos kiri karikil mideb ak, tig wal gi yokek, gos kiri pag yikek, niŋnigal. 17 Bi Kib agebin ak, Kaun ak me. Bi Kib Kaun ne cin eip midenigab ak, tap tari tari gil cinop bi nagiman rek linimij ak, ne pak pag gi ke okok yokil cinop tig asik yoknigab. 18 Pen milik jo milik cin ak karik we gil ma midobin rek, cin magilsek Bi Kib melik tep ne ak miseŋ nipin. Ne gek, cin magilsek ne ke melik tep sek mideb rek linigabin. Cin magil alap nep ne mideb rek ma ulek linigabin; pen ñin nokim nokim ne per nep cinop gi gi gek, cin melik tep ne mideb rek ulek linigabin. Bi Kib nig gip Kaun ak me.

Lim di tin cög gipal rek ak, cin bin bi midobin

4 1 God cinop yimig niŋil dil, wög nibaul ag lek gipin ak me, cin gos par ma nipin. 2 We gil gipal ar ak abe, nabiŋ gek niŋlig gi gipal ar ak abe, cin ma gipin. Bin bi okok kirop minim esek ma apin. Cin God Minim ag ñinig gebin ak, minim cin ognap sek agil ma ag ñibin. Tap tari tari gipin ak, esek ar ak ma gipin. God Minim tep ne ak yipid gil nep miseŋ ag ñibin. Nig gon, bin bi okok cinop niŋil, midmagil nab kiri adaŋ niŋnigal, cin God udin yirik ar ne ak bi tipeg bi rek midobin. 3 Bin bi kimebal okok nep, minim tep miseŋ ag ñibin ak niŋil, usajil bad rek minim tep ak karik midek niŋlig gi, ma nipin apal. 4 Kiri ma nipal ak, Seten kariŋ lim wagin aul god rek mideb ak, gos kiri kom kam gek, Kraiss minim tep melik sek mideb minim ak ma nipal. God ne mideb rek, Kraiss ak rek nep mideb ak ma nipal. 5 Pen minim ag ñibin ak, cin bi tipeg bi rek midobin minim ak ma ag ñibin; Jisas Kraiss ne nep Bi Kib mideb niŋil Jisas wög nop gil, wög gi ñeb bi nibi midobin, agil, minim tep nibep ag ñibin. 6 God ned “Kislim nab eyaŋ melik gaŋ,” agak. God nokim nibak nep melik ne midmagil nab cinop adaŋ ñi leb. Nib ak, God melik tep ne ak Kraiss milik jo milik melik geb ak bir nipin.

7 Lim di tin cög gi lipal rek ak, cin bin bi midobin. Pen God ne tap tep akniŋ ke nibaul cinop nab adaŋ lip. Nib ak nipin, kilis cin ke mer; God kilis ne ke ñek dil nig gil midobin ak nipin. 8 Cinop pis pis yikil gebal ak pen cin pag yoklig gi amobin. Gos par niŋobin ak pen gos sek midobin. 9 Cinop yik gi yokebal ak pen God per cin eip mideb. Cinop yokop gab gab pakebal ma kimobin. 10 Jisas nop pakil ñag pak lilak rek, cinop ak

rek nep pakil ñag pak linig gebal koslam midobin. Pen nig gek, bin bi okok mið goŋ cin niŋil, Jisas komiŋ mideb ak miseŋ niŋniŋal. ¹¹Cin komiŋ midobin ak, Jisas nop niŋ dipal, agil, cinop per per nep ñag pak linig gebal. Pen gipal niðak, bin bi okok mið goŋ cin niŋil, Jisas komiŋ midep magil ne ak niŋnimel, agil, God kirop kirig gek nig gipal. ¹²Cin per per kimjin rek lip ak pen cin nig gon, nið komiŋ midenimib rek lip.

¹³God Minim ak bi alap ñu kil tikil agak, “God nop niŋ dipin ak me, nið agebin,” agak. Nið ak rek, cin ak rek nep God nop niŋ dipin ak me, minim agobin. ¹⁴Cin nipin, God ne Bi Kib Jisas nop di warik ñak rek, cinop ak rek nep di warik ñil, cinop abe niðep abe damil Jisas mideb siŋak linigab. ¹⁵Tap agebin nið aul magilsek niðep nen agil agebin. Nig gon, ñin nokim nokim God ne bin bi tigoŋ tigoŋ koŋai nep di tep gil kod midek, kiri God nop tep aglig gi gel niŋlig gi, yib ne ak i ar alaŋ amniŋab.

God nop niŋ dil gos sek midobin

¹⁶Nið ak, cin gos sek midobin. Mið goŋ ñin tob cin sain gi yonimiŋ rek lip ak pen God cinop per per kaun nab cin adaŋ kilis ñek niŋlig gi komiŋ midobin. ¹⁷Miker sikol dipin nið okok tap kib mer; yokop won ulep alap nep dipin. Pen miker nið okok dil, am Kraið eip midil per nep per nep melik tep kib yib siŋak mid tep giŋigabin. ¹⁸Lim dai ar wagiŋ aul midil, tap uðin magil niŋeb okok gos par ma nipin; tap ar alaŋ siŋak uðin magil ma niŋeb gos nipin. Tap uðin magil niŋeb okok won ulep nep mideniŋab; tap uðin magil ma niŋeb okok per nep per nep mideniŋab.

5 ¹Mið goŋ cin miñi mideb ñin nab aul, karið badak bad rek mideb. Pen karið badak niðak tig wal gel aka ajið gek, God ne cinop karið kisen nið alap karið lim ne seb kab ar alaŋ siŋak gi lek mideniŋabin. Karið niðak bi karið gipal rek mer; God ne ke gi lek, per nep per nep mideniŋab. ²Karið kisen nið niðak kasek dil waliŋ rek tol gin, ag gos niŋlig gi kod midobin. ³Tari ginig: God ne cinop waliŋ tol gi ñek, magil nep ma midoniŋabin. ⁴Miñi karið badak niðaul midil, miker gek niŋlig gi gis pakil ake agobin. Pen kirig gil magil nep midon, agil gos ak ma nipin; seb kab ar alaŋ midep mið goŋ ak ðin, agil gos ak nipin. Mið goŋ komiŋ midep ak ajið, mið goŋ kimeb ned nið ak pið nep nið sakniðim, ag gos ak nipin. ⁵God gos ne ke niŋil, mið goŋ kisen nið ñinim, agil, Kaun ne ak nep ag yokek ajið cinop eip mideb ak me, God ne agak rek nep giŋigab ak niŋ tep giðin.

⁶Nið ak me, cin per per gos sek midobin. Pen mið goŋ nið aul sek midobin ñin nab aul, Bi Kib karið ne seb kab ar alaŋ siŋak ma midobin. ⁷Bi Kib nop gos niŋlig gi ajið ak pen nop uðin ma nipin. ⁸Cin gos sek midobin. Mið goŋ cin aul kirig gil, am Bi Kib eip karið lim ne seb kab ar alaŋ siŋak midoŋin, ag gos ak nipin.

⁹Nib ak, karip lim cin siñaul mib goṅ midonigabin aka kirig gil Bi Kib karip ne am midonigabin ak, nop tep ginigab ar ak nep gin, ag gos ak nipin. ¹⁰Tari ginig: cin magilsek am Krai udin yirik ar ne siñak midon, miñi mib goṅ sek midil tari tari gipin, tep gipin aka titi gi rek gipin ak niñil, pen nibak rek ñinigab.

¹¹Bi Kib ne Bi pirikep mideb ak niñil, kilis gil, bin bi okok nop niñ dinimel, agil, kirop minim tep ne ag ñibin. Cin bi tipeg bi rek midobin ak, God niñ tep gip; nibi ak rek nep, cin bi tipeg bi rek midobin ak abe niñnimib rek lip. ¹²Minim ñu kil tikebin nibaul, cin bi tep cinop dinimib, agil ma agebin. Minim ñu kil tikebin nibaul niñil, cinop nen agil gos niñil miñ miñ ginimib, agil, ñu kil tikebin. Nig gen, bin bi midmagil nab adaṅ mer, mib goṅ sōṅ ar ak nep tari rek mideb ak gos nipal bin bi okok, nibi kirop minim pen agnimib, agil, minim nibak ñu kil tikebin. ¹³Pen minim agebin aul, nibi ognap agnigabim, saköl losip minim nibak ageb, agnigabim. Pen nibi nig gil rek agenigabim ak, Pol, bi okok God yib nop agel ar amnaṅ agil, nib ageb, agil gos ak niñnimib. Pen Pol bi saköl mer, bi gos mideb rek ageb, agenigabim ak, Pol, cinop nen ag gos niñil, bi okok minim tari agebal ak cinop ageb, agil, minim yad niñ dinimib. ¹⁴Krais ne bi nokim yib ak bin bi magilsek nen agil kimak rek, cin bin bi magilsek eip kimnok, agil nipin. Krais cinop bin bi magilsek midmagil lip ak niñil, gos cin ar ak ke niñil ma gipin. ¹⁵Krais bin bi magilsek nen agil kimak. Nib ak, miñi tikil kisen, cinop ke tep ginigab ar ak niñil ma gin; Bi Kib cinop nen agil kimil kauyaṅ warikak ak nop tep ginimiṅ ar ak nep gin.

¹⁶Bin bi lim dai ar wagin aul nib okok nipal rek nep niñil, “Bin bi okok tep, bin bi okok timel,” agil ma nipin. Krais nop ned gos esek ar nibak rek nep niñnok ak pen miñi nop ar nibak rek ma nipin. ¹⁷Bin bi Krais nop cig gipal okok, God gek komiṅ kisen nib ar ak midebal. Tap ned nib ak kir gek, ned mideligipal rek ma midebal; tap kisen nib bir owip. ¹⁸Cin komiṅ kisen nib midobin nibak, God ne nep gek midobin. Ned bin bi ñag ñiṅeb ne midonok ak pen kisen Krais nop ag yokek apil, cinop di God eip jim ñil lil, bin bi ognap sek God eip jim ñil midenimel, agil, cinop wög nibak ag lak. ¹⁹Krais kirop nen agil kimak ak me, God bin bi okok magilsek tap si tap timel gipal okok niñil kirig gen, yad eip jim ñil midenimel, agil gak. Pen God ne cinop minim tep nibak ñil, bin bi okok magilsek ag ñinimib, agil, cinop bin bi wög gep ne ag lak. ²⁰Cin me, Krais bi nab nib ne midil, God minim tep ageb ak dil bin bi okok kirop ag ñibin. Krais bi ne midobin ak me, nibep agobin, Krais minim tep ak niñ dil, yau agem, God nibep di tep gil nop eip di jim ñinigab. ²¹Krais tap si tap timel alap ma gak pen God tap si tap timel cin magilsek Krais nop ñak. God gak nibak, cin Krais eip midil, God komiṅ tep midep magil ne ak sek dinigabin, agil gak.

6 ¹Cin God eip jim ñil wög gipin rek, nibep minim kilis gi agil agobin, God nibep yimig niñil di tep gip ak, ma kirig ginimib. ²God ne ageb,

“Minim nak niñnim agil midenek ñin ak,
yip ag niñnak niñnek.
Nep di komiñ yoknim, agenek ñin ak,
nep gi ñinek,” agak.

Pen niñim! Miñi ñin aul nep God bin bi okok minim niñnim agil kod mideb. Miñi ñin aul nep God bin bi okok kirop tig asik yokek, komiñ amnigal.

³God nop wög gipin ak am tep ginimiñ, agil, niñ tep gil gipin. Bin bi ognap cinop niñil, gos ognap apek, ap yap paknimel ar ak ma gipin. ⁴Pen tari tari gipin ak, God nop wög gipin ak niñnimel, agil, nag tep ar ak nep gipin. Nib ak, God nop wög gil koslam midil ma kirig gipin. Miker tari tari gek, koslam midobin, agil gos nibak ma nipin. ⁵Cinop ñin ognap tapin magil pakpal; ñin ognap miñ lipal; ñin ognap karip lim alap bi warikil polisman eip aka ami bi eip pen pen gil ulep cinop nab siñak abe ñag pak linig gipal; ñin ognap wög gi dam dam añiñ ma lipin; ñin ognap kin tep ma gipin; ñin ognap yuan nep kinbin. ⁶Pen gos tep nep niñil, niñ tep gil, bin bi kirop niñon cinop milik yapek mer, kirop di tep gipin. Cin titi gilig gi nig gipin? Kaun Siñ cinop nab adañ mideb ak me, bin bi midmagil yib lipin; ⁷God cinop kilis ne ñek, Krai minim tep ak yipid gil nep apin; gi tep gep ak kadiñ kisal cin rek ñinmagil yipid abe ñinmagil añidken abe mideb. ⁸Bin bi ognap yib cinop agel ar ameb; bin bi ognap yib cinop del piyak yapeb. Ognap cinop minim tep apal; ognap cinop minim timel apal. Cinop bi tom agep ag gos nipal ak pen cin minim niñid nep apin; ⁹cinop bin bi yib ma mideb ag gos nipal ak pen yib cinop nipal; cin bir kimbin rek lip ak pen komiñ midobin. Cinop tapin magil pakpal ak pen ma kimbin; ¹⁰miker kib gip ak pen miñ miñ gilig gi midobin; bi yim gep rek midobin ak pen wög cin gipin ar ak bin bi koñai nep bin bi gep rek midebal; tap ma mideb rek midobin ak pen magilsek dipin.

¹¹Nibep Korid bin bi okok minim we gil ma agobin, miseñ yib nep agobin; nibep midmagil lipin. ¹²Cin ned nibep midmagil löligipin ak, miñi ak rek nep nig gil nep gipin ak pen nibi cinop ned midmagil löligipim nag ar ak pen dam akal yokpim? ¹³Nibep ñi pai yad rek lek me agebin: cin nibepe midmagil lipin rek, nibi ak rek nep cinop midmagil linimib.

Bin bi Krai nop ma niñ dipal okok eip ma jim ñinimib

¹⁴Nibi bin bi Krai nop ma niñ dipal okok eip ma jim ñinimib. Bin bi gi tep gipal okok, titi gil bin bi gi timel gipal okok eip jim ñil midil gel amek tep ginigab? Bin bi melik midebal okok, titi gil bin bi kislim eyañ

midebal okok eip jim ñil midil gel amek tep ginigab? ¹⁵Krais eip kijeki eip minim ag ar nokim ma linigair. Bin bi Krais nop niñ dipal okok, bin bi Krais nop ma niñ dipal okok eip ak rek nep gos ar nokim ma niñnigal.

¹⁶God komiñ ak, cin sobok gep karip ne midobin. God ne agak,

“Yad nab kirop adañ midil,

God kiri ak miden,

kiri pen bin bi yad

midenigal,” agak.

Pen God sobok gep karip eip, tap yokop sobok gipal tap esek okok eip, minim alap ag ar nokim lil gel amnimiñ rek ma lip.

¹⁷Nib ak, Bi Kib ne agak,

“Kirop kirig gil,

nibi ke midenimib.

Tap yip asiñ lip okok ulik malik ma ginigabim ak,

nibep dinigain.

¹⁸Nap nibi miden,

nibi ñi pai yad midenigabim.

Yad Bi Kib akniñ ke, bi gep yib ak,

nib agebin,” agak.

7 ¹Ñibemmam tep yad okok. God cinop minim tep minim niñid nibak agip rek, tap si tap timel gipin okok miñ goñ cin abe, gos timid cin abe, gi timel gip ak, tap asiñ pis nep kirig gil, God nop pirikil, per per nep gi tep nep gi midon.

Pol miñ miñ gak

²Nibi cinop di midmagil linimib. Cin bin bi nibep alap minim esek agil, gi timel gil, abramek gil ma gipin. ³Yad nibep ag sikol ginig ma agebin. Ned nibep agnek rek, cin nibep midmagil yib lipin; nibep eip komiñ midenigabin aka kimnigabin ak, nibep midmagil lil jim ñil nep midonigabin. ⁴Nibep gos ke nib ognap ma nipin, tep gek nep niñlig gi midebin. Yad nibep gos niñil, miñ miñ gilig gi gos sek midebin. Cinop miker yib gip ak pen yad miñ miñ gilig gi midebin.

⁵Pen cin Masedonia Propins apjaknok ñin ak, won alap añiñ lil yokop ma midonok. Miker ke ke koñai yib midek, cinop pen pen gel, gos par yib niñonok. ⁶Pen God bin bi yimig nipal okok di tep gip ak, Taitas nop ag yokek apek, cinop di tep gak. ⁷Taitas ne siñaul apil, nibi tari tari gil nop di tep gipek minim ar ak agil; yip gos niñ tep gipim minim ar ak agil; nibi yad eip gos ar nokim nep ma niñonok ak nibep yimig gip minim ar ak agil; nibi yad eip kauyañ jim ñil midon, ag gos nipim, minim ar ak agil; yip minim nibak ag ñek niñil yip tep yib gak.

⁸Mij ñu kil tiknek ak niñem, nibep yimig yib gak ak yad won alap gos kib niñnek; pen miñi yad gos kib ma nipin. Minim kilis agil mij ñu

kil tik yoknek nibak, nibi niñem, mapin gak ak pen ak yokop won ulep won alap nep gak. ⁹Kisen me, nab cin aul nag timel ar ak ma gin, agil mapin niñil kirig gipek ak, yad miñ miñ gipin. Nibep mapin gak nibak, God ginim agil niñak rek nep nibep gi tep gak ak me, mij ñu kil tiknek nibak, tep nep tiknek. ¹⁰Bin bi God nop gos niñil, tap si tap timel gipal ak tari ginig nig gipin agil, nag timel gipal ar ak kirig gel, God kirop di komiñ yoknigab ak tep. Pen bin bi God nop gos ma niñil, yokop nep tap sidol gipin ak tari ginig nig gipin, agniñal ak, kimil God ker ma amniñal. ¹¹Pen nibi, tap si tap timel gipim ak tari ginig nig gipin, apek nibak, God gek, gos niñ tep gil gipek. Nibi kilis gil, nab cin aul gi timel ma gipin niñlañ, apek. Nibi pirikil, kal gil, bi nab nibi siñak gi timel gak bi nibak nop gos ñin, apek. Nibi kilis gil, midmagil yib lipim ak, cin nipin nibi tap nibak gi timel ma gipim. ¹²Nibep mij ned ñu kil tik yoknek ak, bi tap si tap timel gak ak aka bi nop gi timel gak ak gos niñil ñu kil ma tiknek. Nibep bin bi nep gos niñil, God niñ midek niñlig gi, nibi cinop midmagil lipim ak nibi ke niñ tep ginigabim, agil, mij ñu kil tiknek. ¹³Pen nibi mij nibak niñil, cinop di tep yib gipim ak me, cin miñ miñ gil gos sek midobin.

Pen Taitas nibep am niñil adik apil kesim dil miñ miñ gak ak niñil, cin ak rek nep miñ miñ yib gipin. Taitas nop di tep gipek ak, miñi ne miñ miñ gil mid tep gip. ¹⁴Taitas nop ned, ai mam Korid okok nep di tep ginigal agnek rek nep nop gipek ak me, yip nabiñ ma gip. Minim nibep apin okok per niñid nep apin rek, minim Taitas nop agnek ak, tapin agnek ak pen ak rek nep niñid yib nep agnek. ¹⁵Pen Taitas amjakil nibep minim agek, nibi pak gil gil gilig gi, minim ne ak dil, nop di tep gipek ak gos niñil, ne nibep midmagil yib lip. ¹⁶Pen yad miñi niñ tep gipin, nibi ar alap ke ma ginigabim; gi tep nep ginigabim ak me, yad miñ miñ yib gipin.

Masedonia bin bi mani kib ñilak

8 ¹Pen ai mam sikop. Bin bi Kraiss eip midebal Masedonia Propins tiñoñ okok, God ne kirop yimig niñil di tep yib gip. ²Mani kiri ma midek, koslam midelak ak pen kiri miñ miñ gilig gi mani kiri God nop abramek ñilak. ³Yad ke nipin, mani kiri koñai ma midek ak pen mani kiri ñeb nab ak nep ma ñilak; kiri kib yib rek ñilak. Gos kiri ke niñil, ⁴cinop minim kilis agil aglak, bin bi Kraiss pis ken midebal okok yuan kib lek yokop midebal okok kirop mani ñin, aglak. ⁵Pen ginimel ag gos niñnok rek ma gilak. Kiri gos niñlak, “Bi Kib bin bi ne midobin ak me, cinop wög tari ñiniñgab ak ginigabin,” ag gos niñlak. Nib agil, Bi Kib nop wög gilig gi, God nop tep gak ak rek cinop wög ognap gi ñinimib agnok ak, kiri nib akniñ rek nep gilak. ⁶Pen Taitas ne ned am nibep agek, wög tep nibak wagin gil ginig gebek rek, nop apin, “Am Korid bin bi okok eip

midenimin, kiri bin bi okok midmagil lep wög tep ginig gebal nibak, nak gi ñenimin pis nep gilar,," apin. 7Nibi me, Kraiss nop niñ di kilis gipim; minim tep ne ak niñ tep gipim; minim wagin ak niñ tep gipim; kilis yib gipim; cinop midmagil lipim. Nib ak me, miñi mani bin bi okok ñinig gebim ak, wög nibak ak rek nep gi tep yib ginimib.

8Pen yad minim kilis agil nig ginimib ma agebin. Yad yokop minim sain sain agebin. Nib ak, bin bi ognap cinop midmagil lipal ak, nibi ak rek nep cinop midmagil lipim aka mer ak niñ tep ginigain. 9Bi Kib cin Jisas Kraiss cinop yimig niñil gi tep gak rek nipim; ne karip ne siñak midil, tap alap ulep ma gek. Mid tep yib gek ak pen nibep nen agil, magilek midek siñak kirig gil, wagin aul apil, bi yim gep rek yib ak midek. Ne nig gak ak, nibi bin bi gep rek, bin bi tap alap ulep ma gip rek midenimib agil, nig gak. 10Mi ned nib ak, nibi ned nep gos niñ tep gil, nig ginigabin apek. Pen nig gil gos niñil, nibi ak rek nep ned nep mani ñibek. Nib ak, gos yad nipin ak nibep agebin. 11Mi ned nib ak nibi gos kilis niñil ginigabin apek ak gos niñlig gi midenimib, pen miñi ak rek nep gos kilis nibak nep niñil, tari ginigabin apek ak bir gi gi dai junimib. Mani nibi miñi midonimiy okok nonim lil, kirop ñeb rek ak miñi pis nep ñinimib. 12God nop tep gip ak, mani God nop abramek ñin. Pen abramek ñin, agon, sikol nep ñeb rek lek, ak abe God nop tep gip. God mani tap cin mideb okok nep wök pageb; mani tap cin ma mideb okok sek wök ma pageb.

13Bin bi mani ñinigabim okok kiri mid tep gel, nibi pen koslam midem, agil ma agebin. 14Pen mani tap nibi miñi koñai mideb rek, kirop ognap nonim li ñem me, kisen nibi ma midenigab ñin ak, kiri pen nibep ognap nonim li ñinimel. Nig gil, kirop eip adip adip rek midenigabim. 15God Minim ak ñu kil tikil aglak, "Bin bi tap mana apal ak koñai nep yiprig dilak okok niñlak kib rek ma gak; kiri ñiñeb rek ak nep midek. Pen bin bi sikol yiprig dilak okok kirop ak rek nep ma tik dak; kiri ak rek nep ñiñeb rek ak nep midek," aglak.

Pol ne Taitas nop Korid ag yokak

16God Taitas nop gos ñek, yad ke kilis gil nibep di tep ginim, agil nipin rek nep Taitas gos niñip ak, God nop tep agebin. 17Taitas am kirop niñil owan, agen, ne ke tep gip rek, miñ miñ gil nibep siñak niñigab. 18Pen bi tep cin alap sek Taitas eip ag yokniñabin. Bi nibak ne Kraiss bin bi karip lim sikol ke ke okok kirop minim tep ak ag ñi ajek niñlig gi, nop bi tep yib apal. 19Cin bin bi okok gi ñon, kiri Bi Kib yib ne agel ar amnañ, ag gos nipin ak me, cin mani nibak dad amniñabin. Pen Kraiss bin bi ke ke okok midebal Taitas nop ag lil, ne cinop eip amil wög tep nibak ginimiy, aglak. 20Pen Kraiss bin bi ne mani kib ñibal ak dil kod mid tep gil, dam bi okok kirop ñon, kiri pen dil nonim li bin bi tap ma mideb okok nonim

li ñinigal. Magilsek gos niñ tep gil, gi tep nep ginigabin ak, cinop minim alap agnimel rek ma linigab. ²¹Bi Kib abe bin bi okok abe cin gi tep nep gipin ak niñnimel ag gos ak nipin.

²²Pen mam cin alap sek ag yoknigabin. Mam nibak ne per kilis gil miñ miñ gilig gi wög gip. Pen miñi ne nibi bin bi tigepe bi rek midebim ak niñil, ne miñ miñ gilig gi siñak ninigab. ²³Ñibemmam Taitas nop ag yoknig gobin ak, ne me yad eip wög jim ñil gil, nibep minim tep ag ñibir. Pen bi ne eip ninigair omal, Kraiss bin bi ne okok cirop mal wög nibak ag lel, Kraiss yib ne agor ar amnañ, ag gos niñil, ninigair.

²⁴Pen kiri piyak siñak amjaker, kirop midmagil yib lil, di tep ginimib. Niğ gem me, minim nibak kib amek, Kraiss bin bi ne midebal karip lim ke ke okok niñil agnigal, “Pol ne Kraiss bin bi Korid siñak midebal okok yib kirop agek ar amib ak, niñid nep agip,” agnigal.

Kraiss pis ken midebal bin bi okok di tep ginimib

9 ¹Pen Kraiss bin bi ne Jerusalem midebal okok mani ñinimib, agebin minim ak, yokop agebin; nibi ke niñ tep gipim. ²Nibi Akaia Propins midebim okok, mi ned ak, mani nibi ñinig gebek ak, yad bin bi Masedonia Propins midebal okok kirop tapin nep apin. Nibi Akaia bin bi ñinig gebek ak, Masedonia kai kirop minim agnek, miñi bin bi koñai nep gos niñ tep gil mani kiri ak rek nep ñebal. ³Pen mam cin miñi agesin okok nibep ag yoknigain ak, nibi mani Kraiss bin bi okok kirop ñeb ak di li tep gil gi jin gi midem, Masedonia bin bi okok, Pol minim ñig nep ageb, agil ma agnimel, agil, kirop ag yoknigain. ⁴Nibi mani li mogim gi tep ma ginigabim ak, Masedonia bin bi ognap poñ dil Korid amjakon, cinop nabiñ ginigab. Pen nibep nabiñ yib ginimiñ rek lip. ⁵Nib ak, mam cin okok kirop ned ag yoknigain. Kiri am nibep eip midel, mani ñinigabin apek ak, li mogim gem midonimiñ. Kisen yad amjaknigain ak, nibi miñ miñ gilig gi mani ñinigabim nibak gi jin gi midenigab.

⁶Nibi nipim, bin bi tap yiñ koñai ma yimnigal okok, tap koñai ma dinigal; bin bi tap yiñ koñai yimnigal okok nep, tap koñai nep dinigal. ⁷Nib ak, nibi bin bi nokim nokim midebim rek, gos nibi ke niñil mani ñinimib. Yirik gek niñlig gi ma ñinimib. Bin bi ognap nibep neb neb gel niñil, ma ñinimib. Bi miñ miñ gil mani ñinigab ak, God bi nibak nop midmagil lip. ⁸God ne tap tep nibep ñinig geb ak, tap sikol ma ñinigab; tapin nep ñinimiñ rek lip. Nib ak, per nep nibi ke tap koñai midenigab niñil bin bi mani ulep ginimiñ okok kirop tap koñai ñinimib rek linigab. ⁹Ar nibak rek, God Minim ak ñu kil tikil aglak,

“Ne bin bi yim gep okok kirop tap tep abramek ñinigab.

Ne per nep kirop di tep gil gi tep ginigab,” aglak.

¹⁰God cinop per tap yiñ ñil, tap magil ñil gip ak, nibep tap yiñ koñai yib ñinigab. Pen ne gek tan tep ginigab niñil nibi dil ognap bin bi tap ulep

gip okok kirop nonim li ñem me, tep yib ginimiñ rek lip. Mani tap nibi ñinigabim ak, God ne gek tap magil koñai yib nep pilnigab. ¹¹ God nibep per gek, tap nibi koñai nep midek, abramek ñeb rek linigab ak me, nibi tap ñilig gi midem, cin damil Kraiss bin bi Jerusalem midebal okok dam ñon, bin bi koñai nep God yib ne agel ar amnigab.

¹² Nig gil, Kraiss bin bi tap ulep gip okok kirop gi tep genigabim ak, kiri tap ulep gip nibak dil mid tep gil, God yib nop ak nep agel ar amnigab. ¹³ Nig gem, bin bi okok kiri God nop gos niñil agnigal, “Kraiss bin bi ne Korid midebal okok, kiri Kraiss minim tep ak dil, ageb rek nep gil, cinop mani kiri abramek ñil, bin bi okok kirop abramek ñil gipal ak, nep tep yib agobin,” agnigal. ¹⁴ God nibep yimig niñil di tep yib gip rek niñil, gos kiri am nibep kom kam gek tep gek niñlig gi, nibep nen agil God nop sobok ginigal. ¹⁵ God ne tap tep akniñ ke cinop ñib ak rek, cin nop tep gip agin!

Polagak, “Bin bi ognap yip minim timel agebal,” agak

10 ¹⁻² Bin bi ognap yip apal, “Pol ne cin eip midil, bi sain minim ma agep bi alap rek mideb ak pen am par okok midil, mij ñu kil tikil, minim kilis agil agip,” apal. Pen kiri minim ar alap agil apal, “Pol ne bin bi lim dai ar wagin aul nib okok nipal rek nep niñil agip,” apal. Kraiss ne Bi sain tep kapkap mideb rek, yib ne agil, yad ke Pol nibep minim kilis agil agebin, nibi gos niñ tep gil gi tep ginimib. Yad amil bin bi yip minim timel agebal okok kirop minim kib agnigain. Pen nibi gi tep gem, nibep nig akniñ rek ma ginigain ak yip tep ginigab. ³ Cin lim dai ar wagin aul midobin ak pen bin bi lim dai ar wagin aul pen pen gipal rek ma gipin. ⁴ Cim kadiñ cin dil pen pen gipin ak, lim dai ar wagin aul di pen pen gipal rek mer. Cim kadiñ cin dil pen pen gipin nibak, God kilis ne ke sek mideb ak me, ñag juek kijeki wari ne tig wal ginimiñ rek lip. ⁵ Bin bi okok kiri God gos niñeb ak kirig gil, gos kiri ke ak niñil, yib kiri ke agel ar ameb ak pen cin God kilis ne dil minim tep ne agon, bin bi nib okok minim tep nibak pen agnimel rek ma lip; cin gos kiri di nag lon, kiri Kraiss minim tep niñ dil ageb rek nep gel ameb. ⁶ Pen nibi Kraiss ageb rek gilig gi midenigabim ak niñil cin kisen bin bi Kraiss nop aleb aleb ñibal okok gos ñon niñnimel.

⁷ Nibi ognap udin nep nipek. Niñ tep ginimib. Bi alap Kraiss bi ne midebin ag gos niñeb ak, Pol ak rek nep Kraiss bi ne mideb ak niñnimin. ⁸ Bi Kib ak nep yip wög ag lek, nibep bin bi kod midebin agebin ak, tapin agebin ak pen, yip nabiñ ma gip. Pen Kraiss ne yip wög ag lak nibak, nibep agen ap yap paknimib, agil, yip ma ag lak; nibep agen Kraiss minim tep ak niñ di tep gil nop cig tep ginimib, agil, yip ag lak. ⁹ Pen nibep mij ñu kil tik yoknek ak, niñil pirikim, agil, ma yoknek. ¹⁰ Bin bi ognap yip apal, “Ne par okok midil, mij nep ñu kil tik yokil, minim kilis yib agip ak

pen siñaul owip nipin ak, bi kib minim apal rek ma agip,” apal. ¹¹Pen bin bi nib agebal okok niñ midenimel. Yad amjakil, ar alap ke ma ginigain; par siñ aul midil, mij ñu kil tikil agebin rek nep ginigain.

¹²Pen bin bi yib kiri ke agel ar ameb okok, kiri kib aka yad kib aka agil, gos ak ma piyo niñnigain. Kiri gos ma lip rek apal, “Cin nep me tep. Bin bi cin gipin rek gipal okok, gi rep gipal; bin bi cin gipin rek ma gipal okok, gi rep ma gipal,” apal. ¹³Pen yad God wög gil gi tep gipin aka titi gipin minim agnig gebin ar ak, God bin bi ke nib okok kirop wög ke ag lak ak, yad minim ma agnigain; God ne yip ke wög ag lak ak nep agnigain. Pen Kraiss minim tep nibep ag ñeb wög nibak, God ne yip ñib. ¹⁴Yad nibi midebim siñak ma amjapnep, minim nibaul ma apnep. Pen nibi midebim siñak yad ke ned nep amil, nibep Kraiss minim tep ak ned ag ñinek. ¹⁵God ne wög yip ag lak. Karip lim ke nib okok ne bin bi ognap kirop wög ag lak. Kiri karip lim nib okok amil wög gipal ak, yad kesim alap ma dinigain. Pen yip tep ginigab ak, nibi Kraiss minim tep ak niñ di kilis yib gi midem, yad nibep nab okok wög kilis gen, wög dai kib rek lek, tap magil pil tep ginigab. ¹⁶Kisen me nibep talak gi apil, am karip lim ned ma ag ñilak ped okok amil, Kraiss minim tep ak bin bi nib okok kirop ag ñinigain. Karip lim ke nib okok ne wög nibak bin bi ognap kirop ag lak. Kiri karip lim nib okok amil wög gipal ak, yad kesim alap ma dinigain. ¹⁷“Bin bi yib alap agel ar amnig ginigab okok, Bi Kib ak yib nop nep agel ar amnañ.” ¹⁸Yib cini ke agon ar amnigab ak, God niñil cinop dinimiñ rek ma linigab; pen Bi Kib yib cinop agek ar amnigab ak me, God niñil cinop dinimiñ rek linigab.

Jisas minim agobin, agil, esek apal bin bi okok

11 ¹Yad minim saköl rek agnigain ak pen minim wagin midek niñlig gi agnig gebin. ²God nibep midmagil lip rek, yad nibep ak rek nep midmagil lipin. Nibep me bin praj mid tep gip ak bi nokim alap nop ag linek. Bi nibak me Kraiss. ³Pen yad pirikpin ak, birarik nep soñ ak esek agek, Ip niñ dak rek, bin bi ognap nibep ak rek nep minim esek okok ag dad amel, nibi pen gos kiri nipal rek niñil, Kraiss nop gos nokim niñil di tep gipim ak, kirig ginimib rek lip. ⁴Minim agebin ak, yad nipin, nibi bin bi okok nib ognap kirop kau ñem, Jisas yad minim ag ñibin ak rek ma ag ñibal; Jisas alap ke rek minim ak ag ñel, abramek dipim. Pen nibi Kaun ak abe, minim tep ak abe ned niñ dipek ar ak rek mer; niñ dep ke kisen nib alap nep dipim.

⁵Pen gos yad nipin, Kraiss minim tep dad ameb bi tep tep nibi nib okok bi kib, yad bi tam okok rek alap ma midebin. ⁶Minim kiri ak, dek kal yib apal ak pen, yad apin rek minim wagin niñ tep gil ma apal. Nibi nipim, yad per nep minim wagin niñ tep gil nibep minim ag ñibin.

⁷Pen nibep God minim tep ag ñinek ak pen mani tap ognap ñinimib agil ma agnek. Yad nibep nab siñak midil nig ginek ak, yad bi sikol rek

miden nibi bin bi kib rek li midenimib, agil, nig ginek. Ginek nibak, yip bi tam okok rek alap agil nipim aka tari? ⁸Yad nibep eip midil Kraiss minim tep ak ag ñiligipin ak, Kraiss bin bi karip lim ke nib ognap yip mani tap ñilak. Mani kiri si dil, Kraiss minim tep nibep ag ñinek. ⁹Nibep eip kin midenek ñin ak, tap nibep alap ma dinek. Ai mam Masedonia nib olak okok nep, tap yad tari ulep gak okok yip dap ñilak. Pen kisen ak rek nep, tap nibi ognap ma ag niñnigain. ¹⁰Minim agebin nibaul, aglig gi nep midenigain. Yad Akaia Propins tigoñ tigoñ okok amil apil gi ajenigain ak, mani tap kiri ognap ma dinigain. Kraiss bi ne midebin rek, niñid yib agebin. ¹¹Pen minim agebin nibaul, nibep midmagil ma lipin aka tari? Mer yib. God niñeb yad nibep midmagil lipin.

¹²Pen mani tap nibep okok ma döliligipin ak kisen ak rek nep gen, bin bi minim esek ag ajpal okok, cin Pol nop rek adip adip midobin, agil agnimel rek ma linigab. ¹³Kiri söñ ar ak Kraiss minim dad ameb bi rek lil, Kraiss wög gobin, apal ak pen Kraiss minim dad ameb bi ma midebal. Minim esek dad ameb bi midebal. ¹⁴Pen ñin ognap Seten ne ke, God ejol melik tep ne alap rek ulek lil owip. ¹⁵Seten nig gip ak, bi nop wög gipal okok, bi wög tep gil gi tep gipal rek ulek lil apenimel, cin gos kib ma niñjin. Pen kisen okok tari tari ginigal okok pen dinigal.

Pol God wög gilig gi miker dak

¹⁶Yad kauyañ agebin, nibi ognap yip bi saköl agil gos ak ma niñnimib. Pen yip bi saköl agil niñenigabim ak, yip kirig gem, bi saköl okok yib kiri ke agel ar ameb rek yad ak rek nep minim ognap agnigain. ¹⁷Yib yad ke agnig gebin ak, Bi Kib gek nig ma ginigain; bi saköl ñagek yib kiri ke agel ar ameb rek agnig gebin. ¹⁸Pen bin bi koñai nep ognap gos ke niñil, yib kiri ke agel ar ameb rek ak, yad ak rek nep ginigain. ¹⁹Nibi gos niñ tep yib gipim rek, bi saköl okok am minim agel, nibep yirik ma gip. ²⁰Bin bi okok nibep wög gi ñeb bi kiri rek mok kiri okok lil, nibep lip gi damil, abramek gilig gi, milik jo milik nibep pakel, nibi minim ma mideb. ²¹Pen yad bi sain bi yokop rek midil, nig ma gipin ak, yip nabin gip.

Pen yad minim saköl rek agebin ak, yib kiri ke agel ar ameb rek, akniñ rek agebin. ²²Kiri Hibru bin bi? Yad ak rek nep Hibru bi alap. Kiri Isrel bin bi? Yad ak rek nep Isrel bi alap. Kiri Ebrahim wagin alap? Yad ak rek nep Ebrahim wagin ak midebin. ²³Kiri Kraiss nop wög gipal? Yad bi saköl yib rek, yib yad ke agen ar ameb ak pen yad wög kilis gi gi, miker ar ke ke dipin rek, bin bi esek apal okok ma gipal. Yip ñin koñai nep miñ lilak. Yip ñin koñai nep tapin magil paklak. Yad ñin koñai nep kim dam nab lil onek. Bin bi okok nig akniñ rek ma gipal. ²⁴Juda kai ñin ke ke akniñ mamid alañ, nag dil, yip yij koñai yib nep pak gis gil ñin juil nokim alap adik gi dam mamid pis kid adañ paklak (39). ²⁵Rom kai ak rek nep ñin

ke ke ñin omal nokim yip yir dil paklak. Ñin alap bin bi koñai nep yip kab juil paklak. Ñig magöb kib ajenek, ñin ke ke omal nokim ñig magöb ak pis nep pipag pakak. Ñig magöb timel gak ñin nib okok, minek alap tap dai bad alap di wös gil, ñig solwara kas ar alaŋ ap ran ap yap sisib gilig gi miden miden, pib pañid amil, kislim gil gi damil, miñab tikak. ²⁶Yad per nep amil apil gi ajpin. Per ajpin okok, koslam yib ajpin. Ñig ulik siñak jupin; tap si dep bi midebal nab siñak ajpin; bin bi yad ke aka Juda bin bi mer nab okok gi ajil, koslam yib ajpin; taun kib okok aka be okok aka ñig solwara nab okok gi amil, koslam yib ambin; bin bi ai mam apal ak pen Kraiss bin bi ne ma midebal nab okok gi ajil, koslam yib ajpin. ²⁷Yad wög koslam gil, wisin kinil mer, ñin koñai nep tap magil ma midek, yuan gek, ñig nen gek, walij ma midek, yigen gil gip. ²⁸Pen miker ar alap me, bin bi Kraiss pis ken midebal kariŋ lim ke ke okok, mid tep gipal aka agil, gos par nipin. ²⁹Kraiss bin bi ognap yap pakniŋ gel, kilis yad ke ak rek nep yoniŋab rek ak nipin. Pen bin bi ognap kirop lip gel tap si tap timel gel, midmagil yip nab adaŋ yur gip.

³⁰Yib yad ke ar ognap agniŋ ak, yad bi kilis ma mideb ak niñnimib, agil minim nibak agniŋain. ³¹Bi Kib Jisas Nap God, per nep yib dap raneb God ak, yad esek ma agebin ak niñip. ³²Yad Damaskas midenek, kiŋ Aretas bi gapna ne Damaskas kod midoliŋip ak, yip miñ lin, agil, polisman okok agek, Damaskas kiŋoŋ tam okok magilsek binem tik saklak. ³³Ñig gilak ak pen mam cin ognap yip di wad kib miŋan ak yigil, nag ñon gil, dam kab wari kis kis gilak kiŋoŋ sikol miŋan ak lip gi yokel, am am lim eyaŋ amil, pirikil ke miñab tam ognap amninek.

Pol dai niñak minim ak ag ñak

12 ¹Yib yad ke agen ar amniŋab ak tep ma ginigab ak pen Bi Kib ak bi alap nop gek dai niñak minim ak agniŋ gebin. ²Mi akniŋ wajrem pis kid adaŋ (14) yowak ak, Kraiss bi ne alap nipin ak, God nop dam kariŋ lim tep seb kab ar alaŋ siñak dad amnak. Pen bi nibak miŋ goŋ sek niŋ ar alaŋ amnak aka, miŋ goŋ kirig gil kaun nep amnak aka, ma nipin; God nep niñip. ³Pen yad nipin, bi nibak — miŋ goŋ sek aka kaun nep aka ma nipin; God nep niñip — ⁴God nop dam kariŋ lim tep seb kab ar alaŋ siñak dad amnak. Pen nib alaŋ amil, minim ke yib niñak. Minim niñak nibak, minim ma agep, bin bi ag ñeb rek mer; minim ke yib ak niñak. ⁵Bi gak nibak yad kilis gil yib ne nep agen ar amniŋab ak pen yib yad ke agen ar ma amniŋab. Yib yad ke minim ognap agniŋ gebin ak, yad bi kilis ma mideb rek nep midebin minim nibak nep agniŋain. ⁶Pen yib yad ke dap raneb minim ognap apnep yad bi saköl rek ma apnep; niñid nep apnep. Pen nib agen, bin bi ognap yip niñil, “Bi ak bi tep ke mideb,” aplap ak yip tep ma gipkop. Yip tep gip ak, kiri yad gipin gipin rek niñil aka minim apin apin rek niñil me, yad bi tigeŋ bi rek midebin

ak ke niŋnimel. ⁷God yip dad amek, bin bi ognap ma nipal rek niŋnek nibak, yib yad ke agen ar amnimiŋ rek lip, agil, God yip tap yur ñeb alap ñib. Tap nibak Seten bi ne rek alap apil, yip ñu rek piŋil i sek mideb. ⁸Bi Kib ak nop ñin omal nokim ag niŋnek, yip nig gip rek ma ginimiŋ ag niŋnek ak pen ⁹yip agak, “Nak ke nep mid tep ginimin rek ma lip ak pen yad bin bi kilis ma mideb okok kirop yimig niŋil kilis yad ke ñen niŋlig gi kiri tep nep midenigal,” agak. Nib agak ak me, yib yad ke agen ar amnigab ak tep ma gip; yip tep gip ak, yad kilis ma mideb bi alap rek midebin ak ag miden niŋlig gi, Kraiŋ yip di tep gilig gi midonimiŋ. ¹⁰Yad kilis ma mideb; yip ag jupal; yad tap tek dip; yip gi timel gipal; yad koslam midebin. Pen Kraiŋ piŋ ken midebin rek, yip titi ginigal ak, miñ miñ nep ginigain. Pen yad ke kilis ma mideb ak niŋ midenigain ak, God ne gek, kilis ne dil kilis gilig gi midenigain.

Pol Korid bin bi okok kirop midmagil lip

¹¹Yad bi saköl rek agesin. Pen nibi nep gem yad nig gesin. Yip di tep gil, minim tep ar ognap apkep ak pen yip kirig gil, bi ognap kirop dipim. Yad bi tam nib bi alap rek midebin ak pen, Kraiŋ minim tep dad ameb bi tep tep nibi nib okok bi kib, yad bi sikol, gos ak ma nipin. ¹²Yad am nibep eip kin midil, cin Kraiŋ minim tep dad ameb bi okok per gipin rek nep gi midenek. Nibi tap ma gep tap ma niŋep genek ak niŋil, yad Kraiŋ minim tep dad ameb bi ne midebin ak bir nipim. ¹³Nib ak, Kraiŋ bin bi ne midebal tigoŋ ognap kirop ginek ginek rek nep nibep ak rek nep ginek ak pen ar nokim alap nep ke ginek. Ar nibak me, tap yip tik dak okok yip ñim, agil ma agnek. Pen nibep gi timel rek ginek ak niŋil kirig ginimib.

¹⁴Nibep ned ñin omal am niŋnek; miñi kauyaŋ ak ninig gebin. Tap nibep alap dinim agil ma ninigain; nibep niŋnim agil ninigain. Nonim nap sikop tap di li tep gil, ñi pai kiri okok kirop ñibal. Pen ñi pai okok, nonim nap sikop kirop nig ma gipal. ¹⁵Nib ak, gos yad nipin ak, nibep nen agil, mani tap yad okok magilsek yok saknigain aka wög gi dam dam Kraiŋ minim tep ak ag ñi dam dam kimnigain ak, minim ma mideb. Pen yad nibep midmagil yib lipin ak niŋnigabim ak, yip pen midmagil ma linigabim aka? ¹⁶Pen nibi agnigabim, “Mani tap cinop ma dipan pen nak minim wai ñi agek cin sidol gipin,” agnigabim. ¹⁷Yad mam ognap nibep ag yoknek ak, mani tap nibep okok uŋin uŋin li dinimel agil ag yoknek aka? ¹⁸Yad nibep nen agil Taitas nop ag yokin, agil, nop ag niŋen yau agak niŋil mam cin alap sek ne eip ag yoknek. Pen yad nipin Taitas tap nibep ognap ma lip gi dak. Taitas yad gipin ar ak nep gip; ne ar alap ke ma gip.

¹⁹Pen yad tari ginig minim nibaul ñu kil tikesin? Nibi gos tari nipim? Pol minim ageb ak, yib ne ma ap yonimiŋ agil ageb, ag nipim ar? Pen ar nibak ma agesin mer. God ne niŋ midek niŋlig gi, yad Kraiŋ bi ne

ar midil minim agesin. Ai mam tep yad nibi kilis gil Kraiis nop cig tep ginimib, agil gos niñil agesin. ²⁰Yad pirikpin ak, yad am nibep niñnigain ñin ak, nibi gipim rek niñen, yip tep ma ginigab. Nibak rek, nibi yip niñnigabim ak, yad gipin rek niñem, nibep tep ma ginigab. Nibi pen pen agil asik ke ke lil, tap kiri okok cin nep din agil, ai mam ognap niñem milik yapek, nibep ke nep tep ginimiñ ar ak nep gos niñil, bin bi ognap kirop minim timel agil, kirop minim dil, yib nibi ke dap ranil, abramek gil ginimib rek linigab ak yad pirikpin. ²¹Pen yad pirikpin ak, piyak siñak kauyañ amil niñnigain, nibi ognap gos timel ar ak niñil, bin si bi si gipim ak, tari ginig nig gipin agil ma kirig gil, bin si bi si gi damil, gos timel niñlig gi damil, abramek gilig gi nep midenigabim. Ginigabim nibak God niñip, agil, yad bi tam nib okok alap rek midil, nabiñ gek niñlig gi, nibep nen agil sil aglig gi nep midenigain.

13 ¹Yad ned nibep ñin omal am niñnek. Miñi pen kauyañ niñnig gebin. God Minim ak ñu kil tikil aglak, “Bin bi ognap kirop minim kib agnig gebal ak, bin bi omal aka omal nokim rek udin kiri ke niñ midel niñlig gi, gi timel gelak, bin bi okok apil miseñ agenigal, niñid rek linigab,” aglak. ²Minek ñin yigwu nab nib ak nibep am niñil, bin bi tap si tap timel gi midelak okok, yad kisen apil kirop ag ginigain agil, adik onek. Miñi nibep eip ma midebin pen kauyañ minim ned agnek rek nep agebin, yad amjakil, bin bi ned tap si tap timel gi midelak okok abe, bin bi miñi tap si tap timel gipim okok abe, nibep yimig ma niñnigain. ³Pen nibi Pol Kraiis eip mideb aka mer ag gos nipim ak, niñ tep ginimib. Kraiis tap ognap karip lim nab nibi okok gek niñnigabim, ne Bi yokop mer; ne Bi kilis ke nib. ⁴Ne bi yokop alap rek lek, nop mab kros bak alañ ñag pak lel kimak ak pen God kilis ne ak gek, kauyañ warikil komiñ mideb. Nib ak rek, cin Kraiis eip midil bi yokop rek midobin ak pen Kraiis komiñ mideb ak ne cinop God kilis ne ak ñek, nibep nen agil wög gin.

⁵Pen nibi Kraiis nop niñ dil nop cig gipin aka mer agil gos bilok amil apil gil, Kraiis nibep eip mideb ak ke niñnigabim. Aka pen gos niñ damil Kraiis nibep eip ma mideb agil ak ke niñnigabim. ⁶Pen yad gos nipin, cinop bi gos niñ damil me, Kraiis cinop eip mideb ak ke niñnigabim. ⁷Cin nibep nen agil, God nop sobok gil agobin, “Kirop kod midenimin, timel ar ak ma ginimel,” agobin. Pen God nop sobok gobin nibak, nibi mid tep gem yib cin ap ranniñniñ agil, ma sobok gobin. Yib cin yonigab ak tap yokop; nibi gi tep nep ginigabim ak tap kib.

⁸Pen Kraiis minim tep ak kib ginimiñ ar ak nep gin; Kraiis minim tep ak sikol ginimiñ ar ak ma gin. ⁹Cinop tep gip ak, cin bin bi kilis ma mideb rek lon, nibi pen bin bi kilis linimib. Nib ak, cin nibep God nop sobok gipin, “Kirop kod midek, nag ar tep nep ginimel,” apin. ¹⁰Bi Kib ne yip wög ag lak nibak, nibep agen ap yap paknimib agil ma ag lak; nibep agen Kraiis minim tep ak niñ di tep gil nop cig tep ginimib agil yip ag lak. Ar

nibak nep yad par kib siŋ aul midil, nibep ned nep mij nibaul ñu kil tik yokebin. Nibi minim yad nibaul niŋil, agebin rek gi mideniŋabim ak me, yad amjakil minim kilis agniŋ gos nipin ak kirig ginigain.

¹¹Ai mam sikop. Miñi minim ag juniŋ gil, “Nibi midebim?” agebin. Mij ñu kil tikebin nibaul oniŋab ak niŋil, cin tap tep ar ak nep gin agil kilis nep niŋ gilig gi midil, minim ñu kil tikebin aul dil, minim ag ar nokim lil, kapkap mid tep ginimib. Niŋ gem me, God bin bi midmagil lil di tep giŋ ak, nibep eip nep mideniŋab. ¹²Nibi Bi Kib nop niŋ dipim rek, pen pen ag wasu dilig gi, mikem bom siloknimib. ¹³Krais bin bi siŋaul midebal magilsek, nibep ai mam okok “Midebim?” agebal.

¹⁴Bi Kib Jisas Krais nibep magilsek yimig niŋil di tep gilig gi midenimiŋ; God ne nibep magilsek midmagil lilig gi midenimiŋ; Kaun Siŋ ne nibep magilsek goŋ bak lilig gi midenimiŋ.